

古今遊記叢鈔

卷之二十一 安徽省

重遊瑯琊山記

明 文徵明

成化乙巳。大人官於滁。徵明隨侍累年。弘治戊申始歸。已酉復至。又居累年。自念平生於滁。豈有宿分。數年來所謂醉翁亭者。遊歷無虛歲。別來幾何時矣。每有人自滁來。輒問訊諸山無恙否。則未始一日忘也。辛亥秋。予有事過南京。距滁才百里。念欲一往。而故人適以書招予。於是重遊之興。不能自阻。乃九月十有四日至滁。止東門魏氏故人家也。明日諸故人來會者數人。相見道舊外。謂山中之行不宜廢。又明日遂往。是日赴約者。李君秉彝。盧君英。于君鑒。及予五人。並轡行二里。未至山。觀道傍怪石。溪溪前人所未嘗奇者。磅礴甚喜。遂登醉翁亭。亭已圯一角。東西壁盡塌。蕭然幾於草墟矣。相顧歎息而去。至瑯琊。敗毀更甚。唯山上下宋元人遊歷名記。剝落之餘。尙隱隱數百處。念此亦久遠物。遂謀遍揚之。抵暮歸。期詰朝再至。則宿具楮墨。凌晨與魏君

徒步往。至始早食。遂手搗三十餘種。多名人字。畫亦多奇麗可喜。且搗且閱。及午而李于兩君來。出所携餅果。相與咀嚼。又搗數十乃歸。再明日而風雨作。連十有二日不止。愧予不能好奇。而歸念又甚急。遍搗之事。遂墮渺茫矣。予生長江南。於滁雖竊慕樂。而南北絕跡。非可以徒至。故雖一著脚。猶不謂易能也。而數年之間。乃至屢遊不已。去而復來。豈偶然哉。雖不能盡歷而覽之。亦自謂於滁不薄矣。而獨有慨然於此者。徒以瑯琊爲淮以南山名。而所謂醉翁亭。又古人茂蹟。不應落寞如是。至於一時題識。其修辭命翰。皆極精緻。至勒之堅珉。自謂可垂不朽。而後世或有見而賞之者。迨今數百年。曾幾人之一顧哉。幸而有知而好之者。而又多所阻滯。况吾與諸君聚散不常。後是而談笑於斯。所未可期也。卽萬一再至。尙能保其存不存乎。此予不能不爲之重念也。遂叙一時之事。以歸同遊者。若景物勝槩。與夫游觀之樂。前人記之屢矣。予不能文。亦不暇述也。所發怪石溪。則別有志。

禮白嶽記

明 李日華

余昔連舉子而殤。家君曰。里中禮白嶽者。生子輒育。曷以瓣香遙祝之。果舉兒亨。越四

日而鄉書至。余與薦。蓋今上辛卯秋八月也。余方治公車裝。壬辰春竟第。留都下。家君迺代余禮嶽。自是歲一遣蒼頭潮。奉香惟謹。今歲庚戌夏。家君忽苦脾疾。已而益劇。余方皇皇醫療。禱籲間。蒼頭潮者。夜忽驚呼。妻蹴之。則曰。主方遣我禮嶽。迨明。余請於家君。曰。白嶽最靈。兄當躬往祈安。柰湯藥未可委人。其具疏忱悃。令潮先乎。則呼命潮。潮因述夜夢。相與嗟異。嘆余念甫萌而神已告矣。潮以五月一日行。家君疾漸愈。至九月秋爽。氣體益平復。余迺以八日治行。辰刻登舟。夜泊石門。

九日。由謝村取餘杭道。曲溪淺渚。被水皆菱角。有深淺紅及慘碧三色。舟行翺手可取。而不設塹塹。僻地淳俗。此亦可見。余坐蓬底。閱所攜康樂集。遇一秀句。則引一觥。酒渴思解。奴子康素工掠食。偶一命之。甚資咀嚼。平生耻爲不義。此其愧心者也。夜泊楊家橋。去縣尙二十里。明晨登陸矣。成一律以應令節。

十日。從餘杭埠口覓筍輿。衝煙而發。三十里至青山坡。石皆沉紫色。老苔漬之。極其古秀。畫家所未能狀也。又十里至五柳。又十里至馬溪橋。溪流得雨。瀾瀾有聲。橋左一大士廟。老僧進杯茗。五里至臨安市。汪鋪饋食。皆淡味。古云山中無鹽豉。故壽其殆然。

耶。

十一日。五里至青溪。渡溪多馬卵石。一路多水碓。泉流甚壯。又五里錢王鋪。又十里至化龍館。十里至橫塘。又十里至藻溪。時雨初霽。雲氣亂如奔馬。四山多畫眉聲。三里至瓶窰河口。溪聲淩淩。跨溪建一觀音閣。老僧煎茗施行者。土人趙老。角巾襦衣。來迎客云。閣本其所建。生二子。一椽史。一諸生。平生步履不越溪上。日聽水聲看山色而已。談吐頗有味。馬少游輩人耳。七里至戴石。十里至鎮郭。有萬壽寺。樹木頗陰森。而像設荒落。五里至方園鋪。十里至太陽鋪。盡日行兩山合沓間。一峰吐雲。一峰送日。夾路野松。雨蒸日炙。香氣撲人。衣袖爲沾漬者。撚之皆有龍麝氣。

十二日雨。十里至廬嶺。十里至昌化縣。縣在萬山中。無城。儒學依一峯下。面對稠林。森秀之極。十里至白石橋。十里至手挖巡司。十里至朱柳。有睢陽雙節廟。遠溪行六七里。四面峰巒廻合。疑無徑路。踰一小嶺。又三里至結口宿焉。是日雨不止。衣袍沾濕。僕夫頗疲頓。余於輿上。領略雲山滃濛之狀。沉綠深黛中。時露薄赭。倏歛倏開。非襄陽米老。斷不能與造化傳神。乃曰。此老高自標置。固非浪語。向余不知畫法。不爲此行。在萬山

中適值澍雨。亦何由證入哉。憶余初從餘杭渡口。晴色可言。止西望有晦昧之意。今乃知余來時。正山靈醞雨之候也。余實步步入雨境耳。

十三日大晴。自峽口起行。五里至高路。五里至橫溪橋。十里至嶺脚。過車盤嶺。五里至順溪。五里至楊家塘。五里至昱嶺關。五里至新橋鋪。上老竹嶺。嶺當兩山廻合處。嶺以東水皆流入太湖。嶺以西水皆流入浙江。山勢兩背相抵。曲澗蛇行其間。萬杉森森。四望疑無出竇。而竹嶺稍通一綫。亦半假人力鑿治。真一夫當關之勝也。氣候新晴。愈覺澄朗。諸峰曉色。澄翠拖藍。日光射之。遠者如半空朱旗。近者如塗金錯繡。丹楓蒼檜。點綴其間。萬壑屯雲。千松漱玉。到此又思李昭道父子畫法。不爲虛設。大小米如中書堂淡瀋判押。挈其總領而已。山有草花。紅媚可人。葉如牡丹。而小土人名之秋海棠。我地秋海棠。生牆陰濕地。花如豆蔻。葉如莧。乃斷腸草。非此種也。今因改名秋牡丹以配之。且令僮輩攜其種歸。不知肯滋殖否。度老竹嶺。西脚鮑店。酒頗醇美。十里至王千巡司。廣葉嶺。鍾嶺。黃土嶺。所謂王千三嶺也。一過老竹。卽爲歙地。山形非不雄壯。而勢稍散濶。土人工殖利。山下開塘畜魚。慮人竊取。則作磚牆圍之。每畝數千百步。以雜樹與柏。

子利薄。多改殖。檀子。砵油。轉售。故無紅葉點綴。鑿石煉灰。多作窖穴。白墜淋漓。可厭。蓋陶白猗卓之策行。則孫綽謝眺。盧浩然之趣。不免減損。物之不能兩大。固其理歟。又十里。至杞梓里宿。

十四日。三里至徐塢。七里至蘇村。五里至斜干。有槐源大石橋。五里至蛇坑。五里至賜麟橋。五里至山後舖。五里至鄭坑。五里至七賢橋。土人云。昔有七賢者。作七井。七竈。爲糜以食餓者。又共作此橋。利濟。詰其姓名。則不知爲何。拂碑。碑泐不可讀。一里至方村。一里至北岸。一里至大佛舖。吳氏住處。喬木陰森。俗傳半夜夫妻八百丁者。有衍慶橋。靖蜒灣。四里至蔡塢口。六里至章祁舖。有越汪公祠。詰土人不知公爲何人。余按唐杜威部將王雄誕傳。稱歙守汪華在郡稱王已十年。雄誕攻降之。至今歙人稱汪王。其卽華耶。抑其子孫耶。五里至郎源口。又五里至稠木嶺。二里至七里廟。有八相公祠。二里至新安第一關。六里至城。遶城行一里。至河西橋。橋有十七洞。下俯大溪。雄跨勝吳江。垂虹也。余以山人裝竹兜前行。不敢過諸豪貴交。人亦無從物色。余蚤息旅館。無事作山中十三聲詩。亦經行所感也。

十五日。十里至巖市鎮。街衢縱橫。車轂湊擊。聚落之雄勝者。以禮嶽故。不敢遲徊流覽。入一小肆。中午餐。几案楚楚。薰爐硯屏。若蘇人位置。壁有文太史畫一幅。題句云。秋色點霜催木葉。清江照影落扶疎。高人自愛扁舟穩。閒弄長竿不釣魚。長洲文壁。十里至楊村。十里高橋。十里萬安橋。十里休寧縣。縣治壯麗。江南北所未見。冒雨行四十里至巖脚。沐浴更衣。躡級而上。日已崦嵫矣。至天門。有青童二人執炬導余歸黃庭院。院主陳建宇吳立齋。具精蔬款余。羽流俱能酒酣肆雄快。絕無城市跼蹐卑趨之態。恨無展陸妙手。作醉道士圖貽之耳。

十六日。五鼓起。盥櫛同羽流鼓吹。詣拜表臺上章。天風獵獵。清寒砭人骨。如置余九霄鬱羅之府。塵海浩浩。俱出履帶下也。歸院午餐罷。羽流乞書扇者。焚集漫占語應之。不復計其工拙。天門外石室中。遇張躡蹻。一百二十歲人。

十七日。蚤下山。改從溪路取嚴州道。

十八日。至休寧。過落日臺。乘月行五十里。至屯溪。

十八日。易船行四十里。至辰山渡。二十五里至箬團山。山多翠箬。十九日行十里至綿

溪有汪五峰墓。

二十日晚至黃館驛。易徽客汪姓者船。夜行五十里。

二十一日至七里瀧。過嚴先生釣臺。

五十里至桐廬。五十里至新店。四十里至富陽。連日大東北風。水勢既闊。行灣曲中。霧氣茫茫。浩如泛海。

二十二日辰刻。霧未解。風勢未定。余從富陽起陸。覓官輿一乘。驛騎四匹以行。沿山度嶺。七十里至六和塔。一望煙江無際。余向所乘舟。竟不知何處。始信置足實地之爲快也。又十里至出山埠。覓西湖划船。至昭慶雲山房宿焉。舟中遇同載一僧。從雲棲來。號慧文。頗知詩。因言雲棲巖下有一穴。僅容一人側臥。有一僧處之上。則草木蕭蕭。下則澗水瀟瀟。僧寒暑不出。慧文作詩贈之。曰。巖上草蕭蕭。巖下水瀟瀟。中有上皇人。側身臥其間。癡憨似布袋。撒顛類寒山。乞食尙無瓢。世故豈相關。自言無體面。要求方寸間。其風可想矣。

二十三日。從松毛場覓舟。得湖客舫。子夜行泊石門。

二十四日抵家哺矣。

黃遊紀略

明 吳廷簡

凡遠山皆作草書畫眉筆意。而黃山獨作隸書勢。鐵畫峻嶒。百里外便迥與諸峯異。予初至家山。每一登高見影。卽心現神飛。而問之父老。游者百不得一焉。蓋山徑崎嶇。弱者不能往。山供澹泊。饒者不欲往。且獨行則孤而無援。招侶則紛而難給。無力者又未易往。予不得已約法三章。杖笠之外。止携一童同遊。各具供資。先期不及期無相待。願者得潘子爾廸家兄雲章家侄德彰立之。偕予五人。決計四月廿六日辰發。先一日爾廸歸巖鎮。邀余掄仲爲導師。至期一僧持爾廸手札至。云掄仲以家事不獲從。適湯寺滌塵上人還山。遂轉屬以接引緣也。相見喜甚。與雲章卽行。繇潛口入山。已抵楊干寺。家侄長孺者在彼先俟。自云久諳黃山。凡嶮難行處。可藉一臂。益喜甚。主僧治具。過午而雨忽大至。立之亦冒雨來。同酌於對山小樓。酣飲大噉。寺僧皆郎當醉倒。遂止宿。明日雨已行。客溪道中。溯溪踰嶺。疊嶂層巒。在他處皆可稱勝者。不知其幾十百也。哺時過芳村。忽見雲門天都突出雲表。譬如旭陽出海。星月燭火。一時無光。又如廟堂朝

會冠裳畢集。俄而天子升御。卽公孤羣辟。素爲兆億具瞻者。無不屏息俯伏。莫敢或貳。衆踊躍讚歎。得未曾有。始知山自有真。半生所見。皆土堆石塊耳。薄暮至祥符寺。浴湯泉大暢。滌塵邀入。飲燈下。有頃。欲散步後園。僧苦勸止。不言其故。怪問之。沙彌但唧唧云。釘爬釘爬。蓋山君之別號。時興正濃。不能聽。果有燈光灼耀出林木間。僧益驚怖。謂是虎目。予迎前視之。則爾廸秉燭追來也。今日發巖鎮。故衝夜始及耳。劇談至夜分就寢。晨起爾廸補浴。予等再浴。池前怪石磊落。作青色碧色水墨色瑠璃色。皆可盤踞。飽聽溪聲。遂沿溪而上。至桃花源。路迂折奇巧。出入各穿一石。如白嶽所謂天門。但稍小耳。中爲掄仲所構桃源庵。入庵登狎浪樓。臨視白龍潭。瀑布飛懸。澄泓潑碧。令人心魂俱冷。潭之上游爲藥爐藥銚。或曰黃帝掘地爲臼。此其遺制也。再上爲蓮花庵。以正對蓮花峰得名。而群峯聳秀。舊列當前。曰青鸞曰硃砂曰天都曰老人曰鉢盂。總之盡作蓮花蓮蕊狀。聞之極樂世界。聲聞天蓮花大如車輪。緣覺菩薩想當如是。獨雲門不可復見。菴中有木根天然几案及鐘鼓架。先達具有銘記。或謂之鼉牀。把玩良久。緣舊徑下。而羣童方哄笑於藥銚側。云中有物如魚而長四足畢具。首如鼠有角。疑其龍也。再

覓之不復見。坐憩潭傍。見左壁巨字。題曰呼龍石。益信其爲龍也。無疑。惜惋久之。歸狎浪飯畢。濃睡夢醒。拭目而諸峯青翠。竦峙牕戶。疑爲天境。不能姑待。急冒日歷山。君巖觀。冉冉至鳴弦泉。泉自巖上滴下。略如白嶽之珍珠簾。無奈烈日熨膚。汗下如雨。不暇細玩。又不忍割愛。急趨硃砂菴。山門少憩。卽循級上有追步而來者。則德彰與謝君錫以仁也。二謝曹溪人。爲山中尊宿。相見不長衣不揖。同至菴禮四面佛。旋轉藏經樓觀木蓮花。樹大如拱。峭直挺立。葉如枇杷。花如茶盞。白瓣帶紫。花葉皆九出。狀與芙蕖無異。問之主僧云。花不常開。間數歲一觀。今適值其盛。芳氣襲人。眞希寶也。出菴而日已暮。復循級下。三浴湯泉。再宿祥符寺。明日四浴湯泉。仍昨徑不入庵。折而上。小僧明惠者。捷過猿猱。健同飛鳥。危磴絕巘。鼓勇先登。衆氣百倍。徑愈上。景愈佳。目愈危。神愈王。忽青鸞峰頂。有道人跌坐。衆駭異。何以至彼。諦視之。石也。謂之仙人打坐。廻首左顧。則正練橫掛於老人峯巔。又枯木爲之。若此類者。不可枚舉。過峯跨入嶺口。則世界劃然天開。千奇萬怪。怵目驚心。精奪神搖。口不得語。仰則天都蓮花。猶在霄漢。俯則深崖邃谷。若臨九淵。諸峯傍無所依。下無所藉。渣滓淘盡。惟存勁骨。青天削出芙蓉。惟此山足。

以當之。老松古柏皆貫石而出。矯激離奇。不可思議。再數百武有小庵。題曰山郵。自祥符至此幾三十里。以興熾殊不覺也。借炊畢。將登文殊頂。僧談及小心坡之險。咸爲色動。又見壁間詩。有至小心坡不敢上者。益信其難。然不能顧也。折而上。瞻觀音石。慈容儼然。當握處適生小樹。恍若執楊枝而灑甘露也。巧至矣。欲攀援以登天都。滌塵阻以無路。乃止。轉下坐蒲團石。探蓮花沚。憩貝葉菴。復上至舊處。猶爲小心坡懷懼。聞爾廸已先行。遂與雲章飛舞而進。殊不見險。問之導者。云已過矣。不覺失聲大笑。君錫長孺反惴惴不前。強拉過之。念佛呼神。手足戰慄。二君老山客也。向所謂險處藉力者。今安在焉。再進而一綫天者。三徑已窮矣。木梯鑿空。衝上井口。如陽神之出泥丸。則絕處逢生。藕斷絲續。文殊院在焉。入院相顧。面俱若鬼。乃明惠猶緣千仞峭壁。倒身懸崖。取一小松以下。觀者駭服。君錫長孺益無人色矣。夜宿甚寒。似人間二月。無怪乎山外齒齧已綻。而山中杜鵑方盛開也。次日將尋舊徑。登蓮花峯。而君錫長孺不欲下梯。浼滌塵別覓鳥道。狹而且滑。險過小心坡。愧悔無及。道盡。達狎石居。飲茶。攝衣登峰。陡級盡上。肩踵相接。五里許過金剛肚。略如小心坡。雲章以杖作槍勢跳舞其上。予曰。是不必恐。

達者以爲華歆之擲金也。君錫長孺進退觸藩。股慄髮豎。大呼菩薩祖宗求佑。匍匐幸過。從問道遁去。予輩不顧而進。奇險相軋。匪夷所思。武窮則洞。洞窮則級。級窮則又洞。或如危橋而石檻天成。或如重樓而虛窻四闢。展轉玲瓏。螺旋蚓折。則有老僧誅茅嵌石壁中。然尙非峯頂也。就彼假爨。又攀援而上。度窄跳一。躡懸梯二。較小心坡金剛肚。不啻百十倍之。惜不令君錫長孺見也。是則黃山之絕頂矣。雲門諸峯盡在足底。雖天都亦稱仲氏。匡廬九華。楚楚眉睫間。一切丘垤。且蟻封視之。呼吸直通帝座。非虛語也。亟令小童下庵取筆硯。予題名石上。是日爲四月晦。適芒種日也。俯視山坳草室爲大悲頂。君錫長孺方偶語室前。不知所云。諒無出謹慎老成之外者。躍而呼之。二君舉頭瞥見。卽掩目而走。衆大笑。又見峯麓有僧攜簞壺而至者。迺下迎之。則滌塵之弟德水也。飯庵中畢。復蜿蜒下至大悲頂。二君已去。追至天海庵。語以峯頂諸境。但搖首曰。何苦乃爾。庵僧桀驁不可與語。遂登煉丹臺。臺較蓮峰爲稍下。而丘壑絕勝。諸峯鬚眉面目。縷析無遺。吳道子顧虎頭不能幾其萬一。德水所攜酒斗許。予與雲章坐松下。罄之不復知有人間世矣。過此爲平天砭。奇松生石上。高不盈尺。而蔽地畝餘。若蒲團者甚。

衆山惟此段稍平衍。陰雨則雲氣布滿。所謂海也。海岸爲光明頂。庵在頂麓。曰光明藏。憩庵中。話君錫長孺諸怯狀。復拉之登頂觀落照。丘壑又奇于煉丹臺。蓋蓮花爲中軍。而此則左右翼也。每臨險地。二君不但自怯。而且怯人。予輩前則二君必却。及至妙絕處。二君已却走回庵矣。是夕同宿光明藏。雄談徹夜。明日爲五月朔。過獅子林。將登始信峰。回顧君錫長孺。忽不知其所在。蓋已預知而先避矣。羣峰環立。怪石如仙人如羅漢如將軍如美女如獅如象如龍蛇如鐘如鼓如覆舟。昨所僅見以爲奇絕者。今且萬計。億計。恒沙計。花木亦然。始信之險。又倍蓮花。攀接引松。度獨木橋。側足而步。下深不測。峰頭奇妙。見者始信。故以名也。旁有繞龍松。鱗鬣森然。作吸海狀。右爲散花塢。紫綠蒼翠。不可譬喻。左則二仙對奕。布局落子。勢皆生動。後立者背手而觀。又有波斯胡負寶而獻。天巧至此。理所必無。而事則實有。奈何折而下至石筍缸。益奇益妙。向者一步一叫絕。今且一步十叫絕矣。勝地結菴。曰冰雲。筍皆平空插起。磷如冰柱。遠隔陡澗。不可攀援。戲以激明惠。令牽藤躍上石壁。已又呼止之。共飯菴中。前後左右。靈怪環擁。石高天小。目眩肉飛。觀至此。蔑以加矣。謀往松谷望仙人榜。僧諫止。衆亦興闌。乃返獅子。

林。竟路下丞相原。道中殊無景況。足底皆砂礫。一步一跌。幸全勝已收。若初經此。游興減半矣。尙有無識人欲繇此上。而以硃砂爲歸途。謂之漸入佳境。譬設客者先陳糠糲。責令饜惱。雖繼以烹龍炮鳳。亦當食不下咽。何漸入之有哉。修路亦屬多事。不若以一九泥封却函谷關也。顛躓二十餘里。始至擲鉢院。叢林甚雅。僧皆馴馴有道氣。不賴此幾無以償此懃矣。肅衣禮佛畢。以仁預命奚童下山買薄醪。共醉溪邊。溪中怪石不減湯泉。中流窈起者高三丈許。攀躋其巔。長嘯遠眺。天都尙戀戀來親人。餘峯恍若夢中矣。夜從枕上聽誦梵聲。思慮清寂。明起咏而歸。道中望九龍潭。儼如貫珠。九瀑懸下。飛簾漱玉。更勝白龍斯游也。訖以五日。昔人多苦雨。而今適當霽月。天朗氣清。峯巒草木歷歷可數。一快也。木蓮花間數歲一開而適值之。二快也。予生北里。未涉山險。而能使君錫長孺退舍。三快也。途中不禁舞蹈。抵湯口。祥符三僧辭歸。長孺次逆旅俟焉。是日始雨。天若有待而然者。留止芳村。明日以仁邀過曹溪。君錫招享酢。以過金剛肚。酬神貳。連雨不止。信宿三日。謝氏竹林昆仲。古樸醇雅。真意藹然。避秦人何必武陵也。贈雲章竹枝簪。贈予仙拳杖。皆天然巧絕。端陽後一日。雨已持歸寶之。尙有長孺神昨。約九

日共享也。雲章謂予曰：他日欲大瞻，只須扳二君游山可矣。

黃遊續紀

明 吳廷簡

殘秋送冷。浮艷既凋。各山真藏畢露。予將自新安返博陵故里。交游一切謝念。獨以三十六峰。未一話別爲憾。孟冬十一日。行裝已束。意慮旁皇。五鼓臥牀。忽夢身浴湯池。有仙人立山半。舉手相招。雖寤而肢體和柔。神理酣悅。猶若靈液潤膚而未釋者。一轉念。憬然驚也。夫有佳山水而不能親。必痼疾拘攣。攣政刑禁束而後可。今名山近在百里。冗累雖紛。非眞必不可拂者。奈何負我素心也。乘平旦正念。習氣未交。急起呼筇輿。一友不暇招。一童不願攜。毅然獨往。童捷慶固請步隨。姑許之。出門遇德彰告以故。期明日追來。遂行。飯呈坎。次官田。滌塵適在予里。聞風踵至。喜可知也。同度阜茨嶺。澗中水落。石骨勁立。清流穿激。如鳴笙簧。嶺額有施茶小菴。予前題曰甘露林。飲茶少息。下嶺至曹溪。日已暝。謝以仁具鷄黍款宿。在坐者君錫合甫及館賓旌德蔣心一也。明日度桑嶺。嶺腮爲寶筏菴。亦予前題。過此至芳村。有謝士升者。具饌相迓。初未識面。亦奇遣矣。晡時入湯寺。罷遣輿夫訖。以仁君錫季昌心一皆至。夜靜共浴湯泉。月色如晝。酣暢偃

舒猶疑是昨朝曉夢耳。恍惚中有人影越溪來赴。驚視之。德彰也。狂喜無措。恐或山妖水魅。假形弄人。諦問則眞者也。拂冗宵奔。不爽山約。如德彰者。何可多得哉。十三日夙興。君錫前怯又萌。倏爾辭去。予輩再浴方起。而胡仲明自古竹溪攜簞壺來從。遂又增一同心友。共議游蹤。以爲必繞山大轉。後上前下。則佳景始遍歷無餘。德水爲導。沿溪而西。過山君巖。鳴弦泉舊徑。顛首北望。仙人橋。若飛虹天際。期登頂已。乃覓徑求之。迤邐度湯嶺而出。南望剪刀峯背。秀不可言。而形則猶夫遠視也。吾鄉人有謂兩刃相距二十里者。耳食一至是乎。夾溪皆立壁千仞。古松蒼翠。倒影水中。跌爲碧潭。以數十許。至弔橋菴。酌仲明所携畢。再跨小橋。燕尾溪流。乃煉丹臺瀑水衝原而下者。與外溪會。勢愈澎湃。再西將度浮遊嶺。石上碧泓三疊如砌。同坐賞之。不忍遽去。而天欲微雨。趨行出嶺。則如忉利天人。降落塵世矣。冒雨下。平路依山旋轉。北折曰翠微寺。寺當峯下。以峰得名。頗覺幽僻。寓室供關漢壽像。睡菴扁曰不負鬚眉。嗟乎。如是而後不負也。吾輩對鏡自顧。將何以謝此鬚眉哉。次早主僧恒生乞號於予。以其禁足也。命曰雪趺。且答以偈。飯畢沙彌導以小徑。屈曲數里。至揔途而別。遂跨峻嶺數重。旣下復上。如颺播